

17 Grupo den Carnaval di Mucha ayera

Luho a domina casi completo e aña aki



ORANJESTAD(AAN): E parada di carnaval di mucha na Playa ayera tabata tin un total di 17 grupo cu duracion promedio di 2 ora. Den ci-

franan cu lo ser publica mañan lo haya un idea si e tabata mas grandi of no cu esun di aña pasa y e añanan cu a pasa.

Locual si a resalta ayera tabata e luho cu casi tur grupo a presenta cune. E dos agrupacionnan cu sigur a sobresali den e parada aki tabata **Dream Kids y Kids of Fame**, hunto cu **Cos di Mucha**, mientras cu e grupo di muchanan di **Nos Futuro** cu acompañamento musical tabata e grupo mas anima durante e parada den cual "**Frega riba dje**" a domina como roadmarch, mientras cu varios agrupacion musical a pone riba caya tambe "**The Wiper**" cu a keda atrae e carnavalistanan mescos cu aña pasa.

Di Noord agrupa den Centro di Bario Noord a presenta seis grupo cu a trece e total di gruponan participante na 17 ayera.

E gruponan di Noord tabata mas riba tereno di fantasia tipico, cu **Playa Pabao y Colegio Sagrado Corazon** cu tema di lama, y e otro gruponan mas bien riba fantasianan.

Di musica no por a keha ayera ya cu tabata tin por lo menos 15 banda musical riba caya, incluso un steelband y un brassband y diferente soundsystem.

E unico comentario cu por a tende na varios caminda di e



ruta ayera cu no mester permiti e plataforma cu auto den parada, sino otro aña en adelante ta tur agencia di auto y otro agencianan lo bini cu un plataforma cu un of otro producto den e parada, cabando asina cu carnaval.

Tabata tin un grupo cu den mas o menos 24 ora a wordo hinca den otro, pa duna muchanan sin disfraz un oportunidad pa participa den carnaval, y esey tabata e grupo di mas o menos 150 mucha cu T-shirtnan di Pepsi Cola y cu acompañamento di Quasi, kendenan a cera e parada prome cu **Dream** a presenta como **Last Lap band**, yenando su tras un biaha mas decenas di cien hende pa balia.

Den edicion di awe por mira

potretnan di e paradanan di fin di siman, mientras cu mañan lo bini cu cifranan relaciona cu e parada aki.

E grupo cu sigur tabata mas creativo y cu a presenta cu mas di diez roadpiece den e parada tabata **Dream Kids**, mientras cu varios otro grupo tambe tabata tin ademá di roadpiecenan, tambe un carosa, y por a ripara cu e aña aki tabata tin mas mucha tambe cu shouderpiece den parada di mucha. Mester duna un credito sigur na e hobencita **Jacqueline la Rosa, Ice Princess**, ganador di concurso di costum, kende a participa e aña aki den cada un di e paradanan y tambe den **Lighting Parade** cu su roadpiece y a briya tambe den cada un.